

- sprach der wirt der alde.  
do lief ein iunger palde  
Her fur, do er die geste sach.
- 80 zu dem alten er do sprach:  
„Zwen iunger sint da fur;  
sol ich in offenen die tur?“  
„Nein“, sprach er: „gench, sprich in zu,  
ich sei gar unledich nu.“
- 85 Do daz den gesten wart geseit,  
mit grozzer demuticheit  
Paten si den alden,  
daz er si wolde enthalden;  
Wan si des wegese mude
- 90 niht wol furwart entruge,  
Seit deu naht herzu schein.  
„nein“, sprach der alde „nein!  
Get enwech, swar eu behage;  
wan ich eu daz fur war sage,
- 95 Daz ich nicht lazze euch her in.  
waz wilder munche mach ditz sein,
- (d) Die so gat ungewar  
in der wuste her und dar  
Irrende und unstaete varn?  
100 zwar ir soldet ez bewarn.  
Wizzet, daz eu fugte paz,  
daz eu die fuzze waeren laz  
Und ir in eweren zellen belibet,  
niht die zeit hie vertribet.
- 105 Get enwertz, lat den spot.“  
die geste sprachen: „ey durch got  
Lazze uns newer dise naht  
mit deinem dache sein bedaht,  
Wan der tach ist vergan.
- 110 durch got heiz uns lan.  
Wir sein sere mude;  
wie ez sich auch gefuge,  
Ob uns beleibet der gesunt,  
wir raumens in der morgen stunt.“